

新曲苑

冊四

- 第十八種 南曲入聲客問
第十九種 在園曲志
第二十種 大成曲譜論例
第二十一種 易餘曲錄
第二十二種 樂府傳聲

南曲入聲客問

新曲苑第十八種

清錢塘毛先舒撰

客問子著南曲正韻。凡入聲俱入聲單押。不雜平上去三聲韻中。是已。然單押仍是作三聲唱之。如畫眉序單押入聲者。首句韻便應作平聲唱。末句韻便應作去聲唱。絳都春序單押入聲者。首句韻便應作上聲唱。豈非仍以入作平上去耶。則又何不仍隸入三聲中耶。余曰。此論極妙。然却又有說。北曲之以入隸于三聲也。音變腔不變。南曲之以入唱作三聲也。腔變音不變。何謂音變腔不變。如元人張天師劇一枝花老老實實。實字中原音韻作平聲繩知切。是變音也。一枝花第五句譜原應用平聲。而此處恰填平字。

平聲字以平聲腔唱。是不須變腔也。東堂老醉春風
倘來之物。物字中原作務。是變音也。醉春風末句韻
譜應去聲。而此處恰填去字。去聲字以去聲腔唱。是
不須變腔也。若南曲畫眉序明珠記金卮泛蒲綠。綠
字直作綠音。不必如北之作慮。此不變音也。畫眉序
首句韻應是平聲。歌者雖以入聲吐字。而仍須微以
平聲作腔也。此變腔也。其尾聲云可惜明朝又初六。
六字竟作六字。不必如北之作溜。此不變音也。然畫
眉序尾聲末句韻應是平聲。則歌者雖以入聲吐字。
而仍須微以平聲作腔也。此北之與南。雖均有入作
三聲之法。而實殊者也。又北曲之以入隸三聲。派有
定法。如某入聲字作平聲。某入作上。某入作去。一定
而不移。若南之以入唱作三聲也無一定法。凡入聲

字俱可以作平。作上。作去。但隨譜耳。如用轂字。而此字譜當是平聲。則吐字唱轂。而作腔便可唱如窩。譜當上聲。則吐字唱轂。而作腔便可唱如窩之去聲。非如北曲轂字之定作古也。餘皆可推。此又與北曲殊者也。故混入三聲。則與北無別。且亦難于分派。如北曲法竟廢却入聲。則四聲不完。所以別出單押之法。而隨譜變腔爲定論也。又南曲系本填詞而來。詞家原備有四聲。而平上去韻可以通用。入聲韻則獨用。不溷三聲。今南曲亦通三聲。而單押入聲。正與填詞家法脗合。益明源流之有自也已。客曰。子之說韻。微哉尚已。抑何不更設一法。令歌者入作入唱。不變三聲。詎不善耶。曰。斯固事理之不得已者也。夫入之爲聲。詛然以止。一出口後。無復餘音。而歌必窈窕而作。

南音入難從
派作三聲

長聲勢必流入于二聲而後始成腔。是固自然而然。不可遏也。今試口中念一入字。而稍遲其聲。則已非復入音矣。況歌者必爲曼聲也哉。

客問北曲既可派入聲入三聲。南曲何故又難派入聲入三聲。曰。北之入作平上去也。方音也。北人口語無入聲。凡入聲皆作平上去呼之。卽如轂字。北人云呼爲古。北曲自應從北音。故中原音韻轂字以入當作上而音古。凡入聲皆然。此周挺齋氏之以入派歸三聲。非任臆強造也。若南曲自應從南音。南人呼轂與穀谷等音同。原不呼古。凡入聲皆然。原未嘗作平上去呼也。則南曲安得強派之入三聲哉。旣難強派。別無歸著。則自應更爲標部而單押矣。歌須曼聲。入便難唱。則自應隨譜之三聲作腔矣。斯理夫復何疑。

客問南曲入聲既可隨通三聲。則凡應用三聲者皆可用入聲耶。曰否。音有四聲。而大段尤重平仄。上去入皆仄聲。凡用入聲。在曲頭腹者。止可通于上去二聲。若平聲。則不可以入聲代之。若以入聲押韻尾者。方可以平上去隨叶耳。然亦須相牌名。不得浪施。亦仍須用入聲部單押。不可與三聲通押。如北曲法。幽閨記。胸中書富五車。山徑路幽僻。拜新月諸曲。皆入與三聲通押。是施君美作南曲。亦沿襲北曲之法。他家如此者亦多。然皆非也。君美春風紫陌齣。引子過曲。俱單押入聲。此得之耳。且余謂南曲入可通三聲。亦謂作腔耳。若吐字亦自須分明。豈可竟溷唱邪。

客曰。子著南曲正韻譜。以爲四聲咸備。今平上去皆有閉口音。而入聲獨無。何也。余曰。勢不可也。入之爲

聲訕然而止。凡曲出字之後。必須作腔。若入聲而又閉口。則竟無腔矣。故三聲可用閉口。而入聲無之也。卽據詩韻緝合葉洽四部爲閉口入聲。而填詞則已雜通他韻。不專于閉口中互通與獨用。至元周德清皆隸入支思齊微歌戈家麻車遮諸韻。而不隸于侵尋監咸廉纖三韻者。亦此意耳。

客曰。南曲入聲既可以唱作平上去。而此三聲原有閉口。則唱入聲者又何不可依三聲而收閉口歟。余曰。覩哉斯駁。然又有兩截三截之分焉。唱入聲不閉口。止是兩截。唱入聲閉口。便是三截。如質字入之。已是兩截。兩截尤可也。若緝字是入之閉口者也。唱者以入聲吐字。而仍須以三聲作腔。作腔後又要收

歸閉口便是三截唇舌既已遽難轉折而亦甚不中于聽矣則廢之誠是而又符填詞與北曲之例尚何疑焉

客曰三聲之唱也有吐字有作腔有收韻亦是三截者唱入聲者獨兩截且三聲既可三截唱而乃謂唱入聲者三截卽不便何也曰又覈哉然凡入聲之唱也無穿鼻展輔歛唇抵齶閉口而止有直喉直喉不收韻者也都無收韻故止兩截也三聲有穿鼻諸條是收韻也收韻故三截也有收韻而三截所以曰原無收韻而收韻是強爲之也強爲之故不便也且三聲作腔止就其本聲故自然相屬而不費力入聲之作腔必轉而之三聲則費力若更收韻則益以不便客曰然子著韻學通指唐人韻四聲表何以但曰入

聲無穿鼻抵齶韻。不曰無展輔歛唇閉口也。曰。詩與曲不同也。曰。然則柴氏古韻通何以標十四緝爲獨用。而合葉洽祇自相通無別通耶。曰。余固云詩與曲不同。柴氏亦爲詩詞辭言之。而余爲曲言之。蓋聲音之道。古與今自不無間殊云。

歌席解紛偶記附

酒客或作黃鶯兒首句二云。纖手白于綿。卽席善歌者歌之。調白字不入調。却難上口。歌者頗精音韻。而作者又自負曲學。兩人辨之不已。余適入坐。叩知其故。笑謂歌者曰。此字譜當用仄聲。而白是仄聲字。作者非誤。但君守中原音韻太專。而不知通變于南曲耳。蓋南曲唱入聲與北曲異。北曲白字定作平聲。已埋切。南曲白字不定作平。唱時但以入聲吐字。而作腔

則隨譜之平上去三聲可爾。據譜黃鶯兒首句第三字當用上聲。則白字當以入聲之白音吐字。而以上聲作腔。不應如北曲之唱作平聲也。今君泥北韻以唱南曲。故枘鑿耳。余語是已。又持南曲入聲客問共閱之。而俱爽然云。

南曲入聲客問終

跋

入聲之不通于三聲也。自古然矣。如度之入爲忖度之度。告之入爲忠告之告。厭之入爲鎮厭之厭。準之入爲隆準之準。使從入聲逆而溯之于平聲。寧不大相徑庭乎。今毛君之論。隨其調之平仄爲平仄。則亦與余逆溯之說相合。但入聲有孤行而無平上去者。吾未如之何也已。然余于此竊亦有法焉。于數說牌名用之。則並不須改唱三聲。亦可安于入聲之本位。而無難也。心齋張漸

在園曲志

新曲苑第十九種

清遼海劉廷璣撰

詞曲創始
於嘯

詞曲莫溯創始。近則考之嘯旨。唐孫廣謂某君授王母。母授南極真人。遞至廣成子。風后。嘯父。務光。堯。舜。禹。其說甚誕。後晉孫登蘇門一嘯。猶襲其傳。登仙去。此道湮沒不復聞矣。雖有權輿正畢十五章。十二法。徒具空文。心傳無授。究何益哉。迨風雅變爲騷賦樂府。五言七言詩體化爲詩餘。及南北詞曲。而填詞家猶名其譜曰嘯餘。亦存餽羊之義耳。

舊弋陽腔。乃一人自行歌唱。原不用衆人幫合。但較之崑腔。則多帶白。作曲以口滾唱爲佳。而每段尾聲。仍自收結。不似今之後臺。衆和作喎喎囉囉之聲也。

諸腔以外

西江弋陽腔。海鹽浙腔。猶存古風。他處絕無矣。近今
且變弋陽腔爲四平腔。京腔。衛腔。甚且等而下之。爲
梆子腔。亂彈腔。巫娘腔。瑣哪腔。囀囁腔矣。愈趨愈卑。
新奇疊出。終以崑腔爲正音。

歌曲盛于唐之梨園。故今名伶人爲梨園子弟。然當時所歌。以絕句爲樂府。而音律分別。乃有清平調。小秦王。竹枝。柳枝。雨淋鈴。憶王孫。伊州。涼州。陽關。各種之異。欲深考辨別。杳不可得。清平一調。當時作者甚多。惟青蓮合拍。此中妙解。卽詢諸填詞與善歌老白相。亦莫一解也。觀旗亭佳話。歌一絕句。而龜年懷智輩。以衆器配之。六音皆叶。傾聽之下。不知如何抑揚頓挫也。宋專事詩餘。歌詩之道廢。迨元作北曲。詩餘遂爲定場白之前引。明崑山魏良輔。能喉轉音聲。始

變弋陽海鹽故調爲崑腔。梁伯龍填浣紗記付之。
王元美詩所云。吳闔白面冶游兒。爭唱梁郎雪豔詞。
今之崑腔是已。卽所謂南曲整本也。

元北曲每本不過四五折。曲皆一人始終獨唱。衆以
白間之。若南曲則不獨人可一齣。甚有一齣幾人分
唱者。至後龍子猶輩出。以南北間錯。故有北新水令
南步步嬌一套。北醉花陰南畫眉序一套。如此不可
枚舉。後更碎割諸曲。以成一曲。名曰某犯。或串合佳
名。如金絡索。掛梧桐之類。總曰新增。歌者不得不曲
折以赴之。亦苦道也。久沿不覺。習而安矣。然今日人
盡薄填詞爲容易。而尊詩詞爲上乘。黃九烟周星云。
詩降爲詞。詞降爲曲。愈趨愈下。愈趨愈難。嘗爲之語
曰。三仄更須分上去。兩平還要辨陰陽。詩與詞曾有

是乎。

何元朗評施君美幽閨。出高則誠琵琶之上。王元美目爲好奇之過。臧晉叔謂琵琶梁州序念奴嬌二曲。不類則誠口吻當是後人竄入。王元美大不以爲然。津津稱許不置。晉叔笑曰。是烏知所謂幽閨者哉。以予持衡而論。琵琶自高于幽閨。譬之于詩。琵琶杜陵也。幽閨義山也。比之時藝。琵琶程墨也。幽閨房書也。琵琶語語至情。天真一片。曲調合拍。皆極自然。真是天衣無縫。至于才人點染。淺深濃淡。何事不然。豈梁州序念奴嬌二曲。遂謂各一手筆乎。觀少陵詩。何法不備。何態不呈。烏可以一家之管見測之哉。

前人云。鄭若庸玉玦。張伯起紅拂。以類書爲傳奇。屠長卿曇花終折。無一曲。梁伯龍浣紗。梅禹金玉合。道